

Char «lockdown», giain sin distanza!

Ina brev averta per «far schluss»

DA DAVID TRUTTMANN/FMR

Char «lockdown», bunamain dus mais ans has ti accumulà. Igl è stà ina relaziun fitg difficila. Nus e ti. Perquai èsi bun sche nus giain ussa puspè plaun a plaun sin distanza. Vias separadas. En tutta pasch.

Vulain dar in sguard enavos sin nossa relaziun. Ils 16 da mars ha il Cussegl federal ditg che ti sajas ussa qua e che ti serrias ustarias, scolas e la gronda part da las butias. Gea, il Cussegl federal ans ha propri mess a cor che ti sajas in bun gidanter en il cumbat encunter il coronavirus. Che ti sajas bunamain noss' unica schanza per sbassar la curva d'infecziuns e per evitar in collaps en ils spitals, han ditg Berset, Sommaruga, Koch e cumpagnia da perits.

Schegea che nus avevan l'entschatta anc in zichel fadia cun tes num englais – ed avain era tschertgà variantas rumantschas – sch' eran nus tuts per dir la vardad bunamain in pau cuntents che ti es arrivà. Cun tai era tuttenina tut uschè cler. Avant na savevan nus durant bunamain in mais betg sche nus possian anc trametter cun in bun sentiment noss uffants en scola, sche nus possian anc ir a bai-ver la saira ina biera cun collegas, sche nus possian insumma anc ans dar il maun. Cun tia arrivada ils 16 da mars èri cler sco il sulegl per in e mintgin. Ti ans has dàagir-



Char «lockdown», grazia che ti has procurà durant tia preschientscha era per da questas affischas, sco per exempel il cordial giavisch per sanadad a Müstair. FOTO D. TRUTTMANN

tad! E ti has perfin dà il ticket per restar cun buna conscienza a chasa, per discutir vivamain davart chaussas inutilas, sco p. ex. co mazzar il temp cun serias da Netflix, co cuschnar receipts thailandais en la crisa e co tgirar noss sixpack negligi cun fitness@home. In mument era quai per blers da nus ina quarantina cun pralinés. In flirt cumadaivel.

Ma svelt è vegnì il mintgadi. U apunta in mintgadi che nus na vulevan ensasez gnanc. Nus avain survegnì pes fraids en nossa relaziun. È quai propri l'avegnir sco nus ans imaginain? Chattain nus uschia nossa fortuna? E surtut: Es ti propri ina buna «partida»? Na perdain nus betg memia blers raps

sche nus restain memia ditg ensemen cun tai? La resposta è stada clera suenter mo in mais da relaziun: Nus ans stuain separar! Per raschuns da sanadad betg cun in grond sfratg, mabain mo pass per pass.

Or da buns amis essan nus diventads inimis. Però sco tar tut ils auters inimis pudain nus er observar tar tai: Ils inimis seccan sgarschavel las ballas, els disturbun e mussan uschia senza remischun noss agens sbagls. Els te-gnan nà a nus il spiegel. Tar tai è quai stà exact il medem. Tuttenina ans avain nus stuì far dumondas dischagreablas: Avain nus propri tut sut controlla? U è tut noss sistem fitg fragil? È noss mintgadi

propri uschè stupent sco nus pensain? Co fissi cun pli pauc? Co fissi cun ans organisar auter, en furmas e manieras pli solidaricas? E gea, ironia da tes num internaziunal, cun tes «lockdown» has ti era mussà quant impurtant ch' il mund «local» è: la stizun en vischnanca, la buna vischina che gida e fors era la gassetta locala che rapporta da mintga fracziun. Ti ans has mussà quant solidarica e creativa che nossa cuminanza savess atgnamain esser. Ti ans has era mussà pussaivladads per autras furmas da viver e lavurar en avegnir, cun homeoffice, homeschooling e cultura sin distanza. E ti ans has sfurzà da reinventar per in brav temp noss cumportament d'igiene en il spazi public ed a chasa.

Perquai, char «lockdown», vulevan nus bain er engraziar: Malgrà ch'igl è stà difficil avain nus era fatg durant nossa relaziun intginas experientschas che pon gidar en il futur. Però tge che nus prendain or da nossa relaziun e co nus vulain emprender or da noss dis cuminaivels, quai stuain nus ussa decider sezs – senza tai.

A partir dad oz es ti mo pli preschent qua u là en noss mintgadi. Betg per mal, ma quai è bun uschia. Pli pauc che nus ans vesain e pli simpel ch'igl è d'emblidar.

Damai, char «lockdown», igl è duras che ti vas. Igl è uras da dir chau. Però senza dar il maun.